

Na osnovu člana 3. stav (3) Zakona o novčanim podrškama u poljoprivredi i ruralnom razvoju („Službene novine Federacije Bosne i Hercegovine „broj 42/10) i člana 35. tačka c) Statuta Grada Bihaća („Službeni glasnik Grada Bihaća“ broj 13/15), Gradsko vijeće Bihać na 22. sjednici, održanoj dana 28.04.2016.godine, d o n o s i

O D L U K U

o utrošku sredstava namijenjenih za razvoj poljoprivrede na području grada Bihaća u 2016.godini

I OPĆE ODREDBE

Član 1.

(Predmet Odluke)

Ovom Odlukom utvrđuju se uvjeti, kriteriji i način utroška sredstava namijenjenih za razvoj poljoprivrede na području grada Bihaća u 2016.godini.

Član 2.

(Novčana sredstva)

Novčana sredstva za realizaciju Odluke u iznosu od 400.000,00 KM , planirana su u Budžetu Grada Bihaća za 2016.godinu sa pozicije TG za privredu i turizam, ekonomski kod 614300-tekući grantovi neprofitnim organizacijama-Program poticaja privredi i poljoprivredi.

Član 3.

(Cilj Odluke)

Cilj je da se realizacijom ove Odluke nastave započeti i otvore novi procesi u poljoprivrednom sektoru kako bi se postiglo sljedeće:

- a) povećati obim poljoprivredne proizvodnje kroz rast produktivnosti , povećanje sjetvenih površina i privođenje kulture neobrađenog poljoprivrednog zemljišta
- b) stabilizacija dohotka primarnih poljoprivrednih proizvođača
- c) stvaranje tržišno orijentiranih proizvođača
- d) zapošljavanje nosioca i članova poljoprivrednog gazdinstva
- e) osavremenjavanje poljoprivrednih gazdinstava kroz nabavku opreme za poljoprivrednu proizvodnju te primjenu novih naučnih dostignuća
- f) legalizuju postojeći stajski i drugi pomoćni objekti koji se koriste za poljoprivredu na porodičnim poljoprivrednim gazdinstvima

Član 4.

(Vrste novčanih poticaja)

Sredstva iz člana 1.ove Odluke koristiće se za sljedeće :

- a) Poticaji za animalnu proizvodnju – sufinansiranje vještačkog osjemenjavanja i podrška pčelarima
- b) Poticaji za biljnu proizvodnju – sufinansiranje kupovine repromaterijala za jesenju i proljetnu sjetvu , sufinansiranje proizvodnje krastavca kornišona, poticaji za proizvodnju kupusa i bijelog luka na otvorenom polju
- c) Poticaji za proizvodnju povrća u zaštićenom prostoru
- d) Poticaji za voćarstvo – sufinansiranje kupovine sadnog materijala jagodičastog voća
- e) Poticaji za uzgoj gljiva
- f) Ostale vrste novčanih poticaja

II KRITERIJI ZA RASPODJELU SREDSTAVA

Član 5.

(Kriteriji)

Planirana financijska sredstva u Budžetu Grada Bihaća raspoređivat će se fizičkim i pravnim osobama prema općim i posebnim kriterijima propisanim ovom Odlukom.

1. Opći kriteriji

Član 6.

Opći kriteriji za ostvarivanje novčanih poticaja su :

- a) da podnosilac zahtjeva ima prebivalište na području grada Bihaća
- b) da je poljoprivrednu proizvodnju zasnovao na području grada Bihaća
- c) da je poljoprivredna proizvodnja osnovni ili primarni izvor egzistencije za nosioca i članove poljoprivrednog gazdinstva
- d) da se podnosilac zahtjeva bavi poljoprivrednom proizvodnjom i da je upisan u Registar poljoprivrednih gazdinstava i Registar klijenata u skladu sa Zakonom o poljoprivredi („Službene novine Federacije Bosne i Hercegovine“broj 88/07 i 4/10) i Pravilnikom o upisu u Registar poljoprivrednih gazdinstava i Registar klijenata („Službene novine Federacije Bosne i Hercegovine“broj 42/08)

2. Posebni kriteriji

Član 7.

- (1) Posebni kriteriji za ostvarivanje prava na novčane poticaje u poljoprivredi utvrđuju se ovom Odlukom posebno za svaki vid proizvodnje.

III VRSTE NOVČANIH PODRŠKI

1. Animalna proizvodnja

Član 8

(podrška za sufinansiranje vještačkog osjemenjavanja goveda)

(1) Pravo na novčanu podršku za sufinansiranje vještačkog osjemenjavanja goveda imaju poljoprivredni proizvođači koji dostave potvrdu nadležne veterinarske organizacije sa područja grada Bihaća da je grlo vještački osjemenjeno i potvrdu da je grlo pod veterinarskim nadzorom kao i fotokopiju pasoša za životinju. Pravo na ovaj vid novčane podrške imaju samo za prvo osjemenjavanje po grlu i to u iznosu od 20 KM/grlu.

- (2) Rok za podnošenje zahtjeva je kontinuirano tokom 2016. godine.

Član 9.

(podrška pčelarstvu)

(1) Pravo na novčanu podršku imaju pčelari putem Udruženja pčelara Grada Bihaća za kupovinu potrebne hrane za pčele i druge opreme u pčelarstvu

(2) Udruženje je u obavezi dostaviti izvještaj o raspodjeli i utrošku sredstava u roku od 30 dana od dana prenosa sredstava .

- (3) Rok za podnošenje zahtjeva je kontinuirano tokom 2016. godine

2. Biljna proizvodnja

Član 10.

(sufinansiranje kupovine repromaterijala za proljetnu sjetvu)

(1) Pravo na sufinansiranje nabavke repromaterijala za proljetnu sjetvu (sjeme kukuruza i mineralnog đubriva NPK) imaju oni poljoprivredni proizvođači koji u proljetnoj sjetvi 2016. godine na području grada Bihaća zasiju kukuruz na najmanjoj površini od 0,5 ha.

(2) Kupovina mineralnog đubriva sufinansiraće se sa 0,25KM/kg,a maksimalna količina za koju jedan poljoprivredni proizvođač može ostvariti novčanu podršku iznosi 750 kg.

(3) Kupovina sjemena kukuruza sufinansiraće se sa 20% od cijene jednog pakovanja kukuruza od 25.000 zrna,a maksimalan iznos novčane podrške po ovom osnovu iznosi 250,00 KM.

(4) Podnosioci zahtjeva pored općih uvjeta koje moraju ispunjavati dužni su dostaviti i fakturu i fiskalni račun da su u proljeće 2016.godine kupili deklarirano sjeme kukuruza i mineralno đubrivo NPK.

(5) Rok za podnošenje zahtjeva maj-juni 2016.godine

Član 11.

(sufinansiranje kupovine repromaterijala za jesenju sjetvu)

(1) Pravo na sufinansiranje nabavke repromaterijala za jesenju sjetvu (sjeme pšenice , raži, ječma i mineralnog đubriva NPK)imaju oni poljoprivredni proizvođači koji u jesenjoj sjetvi 2016.godine na području grada Bihaća zasiju pšenicu i raž na najmanjoj površini od 0,5 ha.

(2) Kupovina mineralnog đubriva sufinansiraće se sa 0,20KM/kg,a maksimalna količina za koju jedan poljoprivredni proizvođač može ostvariti novčanu podršku iznosi 750 kilograma mineralnog đubriva

(3) Kupovina sjemena strnih žita sufinansiraće se sa 0,30 KM/kg a maksimalan količina žita za koju jedan poljoprivredni proizvođač može ostvariti novčanu podršku iznosi 600kg.

(4) Podnosioci zahtjeva pored općih kriterija koje moraju ispunjavati dužni su dostaviti fakturu i fiskalni račun da su u jesen 2016.godine kupili deklarirano sjeme strnih žita i mineralno đubrivo NPK

(5) Rok za podnošenje zahtjeva oktobar-novembar 2016.godine

Član 12.

(novčani poticaji za proizvodnju krastavca kornišona)

(1) Pravo na novčanu podršku za proizvodnju krastavca kornišona imaju oni poljoprivredni proizvođači koji pored općih ispune i sljedeće posebne kriterije:

- a) u kooperaciji sa registrovanim otkupljivačem zasiju krastavac kornišon na najmanjoj površini od 0,1 ha i isporuče minimalno 1000 kg krastavaca
- b) dostave ugovor o otkupu sa registrovanim otkupljivačem
- c) dostave otkupne blokove za predatu količinu krastavaca

(2) Rok za podnošenje zahtjeva je august-septembar 2016.godine

Član 13.

(novčani poticaji za proizvodnju povrća na otvorenom polju , kupusa i bijelog luka)

(1) Pravo na novčanu podršku za proizvodnju kupusa i bijelog luka ostvaruju proizvođači koji proizvedu ovu vrstu povrća na najmanjoj površini od 1 ha za kupus i 0,5 ha za bijeli luk.

(2) Za ovaj vid proizvodnje stručna lica zaposlena u Službi za opću upravu , privredne i društvene djelatnosti sačinice zapisnik na terenu o zasađenoj površini .

(3) Rok podnošenja zahtjeva je maj 2016.godine

3. Proizvodnja povrća u zaštićenom prostoru

Član 14.

(novčani poticaji za proizvodnju povrća u zaštićenom prostoru)

(1) Pravo na novčanu podršku za proizvodnju povrća u zaštićenom prostoru ostvaruju proizvođači koji proizvedu povrće u zaštićenom prostoru najmanje površine 100m².

(2) Za ovaj vid proizvodnje stručna lica zaposlena u Gradskom organu uprave sačinice zapisnik na terenu o površini plastenika i kulturama zasađenim u momentu izlaska na teren.

(3) Rok za podnošenje zahtjeva je septembar 2016.godine

4. Poticaji za razvoj voćarstva (zasnivanje novih zasada jagodičastog voća)

Član 15.

(novčani poticaji za zasnivanje novih zasada jagodičastog voća)

(1) Za ostvarivanje prava na novčanu podršku za zasnivanje novih zasada jagodičastog voća podnosilac zahtjeva mora ispunjavati sljedeće posebne kriterije:

- a) da je zasnovao novi zasad jagodičastog voća na najmanjoj površini od 0,1 ha
- b) da je u tekućoj godini kupio deklarirani sadni materijal u količini koja je prosječni normativ za određenu voćnu vrstu od registrovanog proizvođača sadnog materijala
- c) da je dostavio fakturu, fiskalni račun, deklaraciju o zdravstvenoj ispravnosti sadnog materijala i pedološku analizu tla

(2) Zasad se može zasnovati samo na parcelama upisanim u Registar poljoprivrednih proizvođača i Registar klijenata na ime podnosioca zahtjeva.

(3) Kupovina sadnog materijala sufinansiraće se sa 25% od cijene koštanja a maksimalna površina za koju jedan poljoprivredni proizvođač može podnijeti zahtjev za sufinansiranje kupovine sadnog materijala je 0,5 ha.

(4) Rok za podnošenje zahtjeva je april-novembar 2016.godine

5. Poticaji za proizvodnju gljiva

Član 16.

(novčani poticaji za proizvodnju gljiva)

(1) Za ostvarivanje prava na novčanu podršku za proizvodnju gljiva podnosilac zahtjeva treba da pored općih kriterija ispunjava i sljedeće posebne uslove:

- a) da se bavi proizvodnjom gljiva
- b) da je prostor u kojem se proizvodnja obavlja opremljen potrebnom opremom

d) da dostavi fakturu i fiskalni račun za kupovinu komposta

(2) Maksimalan iznos sredstava koji jedan proizvođač može ostvariti za ovaj vid proizvodnje je 500,00 KM.

(3) Rok za podnošenje zahtjeva je do novembra 2016.godine

6. Ostale vrste novčanih poticaja

Član 17.

(drugi vidovi poticaja)

U okviru ostalih vrsta novčanih poticaja , a u zavisnosti od raspoloživih sredstava može se podržati slijedeće: sufinansiranje projekata iz oblasti poljoprivrede, refundiranje dijela troškova za penziono i socijalno osiguranje za registrovane poljoprivredne obrte, regresiranje kamata na poljoprivredne kredite, hitne intervencije u poljoprivredi, sufinansiranje pribavljanja potrebne dokumentacije (urbanističke i građevinske dozvole) za legalizaciju i izgradnju stajskih objekata i drugih pomoćnih objekata koji se koriste u poljoprivredi na porodičnom poljoprivrednom gazdinstvu a ukoliko se ukaže potreba i za organizovanje edukacija za poljoprivredne proizvođače.

Član 18.

(sufinansiranje pojedinačnih projekata u poljoprivredi)

(1) Sufinansiranje pojedinačnih projekata iz oblasti poljoprivrede za koje Komisija koju imenuje Gradonačelnik ocijeni da su opravdani te da ispunjavaju postavljene kriterije u maksimalnom iznosu do 50% od vrijednosti dostavljenog projekta.

(2) Iznos odobrenih finansijskih sredstava utvrdit će Komisija za svaki zahtjev pojedinačno na osnovu dostavljenog projekta i raspoloživih finansijskih sredstava i predložiti Gradonačelniku za sufinansiranje one projekte za koje ocijeni da će se njihovom realizacijom unaprijediti poljoprivredna proizvodnja na području grada Bihaća.

(3) Zahtjevi za sufinansiranje projekata iz oblasti poljoprivrede podnose se tokom cijele godine na propisanim obrascima.

(4) Korisnik ovih sredstava u obavezi je u roku od 60 dana od dana prenosa finansijskih sredstava dostaviti izvještaj o utrošku istih a Komisija će na licu mjesta sačiniti zapisnik o namjenskom utrošku sredstava.

Član 19.

(refundiranje dijela troškova po osnovu penzionog i zdravstvenog osiguranja za registrovane poljoprivredne obrte)

(1) Refundiranje dijela troškova po osnovu penzionog i zdravstvenog osiguranja za registrovane poljoprivredne obrte sa 50% .

- (2) Pravo na ovaj vid podrške imaju poljoprivredni proizvođači koji:
- a) imaju registrovan poljoprivredni obrt kao i oni koji registruju obrt u 2016.godini,
 - b) redovno izmiruju poreske obaveze(dostave uvjerenje poreske uprave da nemaju neizmirenih poreskih obaveza) ,
 - c) dostave ovjerenu izjavu da će se ovim obrtom baviti najmanje tri godine.
- (3) Isplata ovih sredstava je šestomjesečno u toku tekuće godine.
- (4) Na ovaj vid poticaja nemaju pravo oni poljoprivredni proizvođači koji ostvare poticaj po ovom osnovu putem Federalnog ministarstva poljoprivrede, a u sklopu Programa sufinansiranja samozapošljavanja i zapošljavanja u oblasti poljoprivrede za 2015/2016.godinu na osnovu Odluke Vlade Federacije Bosne i Hercegovine broj :1394/15 od 15.10.2015.godine.

Član 20.

(regresiranje kamata na poljoprivredne kredite)

(1) Kamate na poljoprivredne kredite podignute u komercijalnim bankama i mikrokreditnim organizacijama regresiraće se sa 4% od iznosa ugovorene kamate koja ne smije prelaziti 8,5% na godišnjem nivou.

(2) Pravo učešća za ovaj vid novčane podrške imaju sva fizička i pravna lica koja su podigla namjenske kredite za poljoprivrednu proizvodnju u maksimalnom iznosu do 50.000,00KM i koji dostave ugovor o kreditu i potvrdu banke o iznosu uplaćene kamate u 2016.godini.

(3) Regresiranje kamata neće se odobriti za kredite ili dio kredita koji su namijenjeni reprogramiranju drugih kredita.

Član 21.

(hitne intervencije u poljoprivredi)

(1) U slučaju pojave zaraznih bolesti, uginuća goveda na porodičnom poljoprivrednom gazdinstvu teškog materijalnog stanja,opravdanim zahtjevima za kupovinu krave ili ovaca,požarima na poljoprivrednom gazdinstvu i slično ostavlja se mogućnost Gradonačelniku da hitno interveniše i za ovu namjenu planirana su sredstva u iznosu od 30.000,00KM.

(2) Maksimalan iznos sredstava koji podnosilac zahtjeva može dobiti po ovom osnovu je 3000,00KM uz priloženu dokumentaciju:

a) dokaz ovlaštene veterinarske organizacije o uginuću grla uslijed pojave zaraznih bolesti

b) dokaz o pričinjenim štetama na poljoprivrednom gazdinstvu(zapisnik Komisije za procjenu šteta na području grada Bihaća)

(3) Korisnik ovih sredstava u obavezi je da u roku od 60 dana od dana prenosa financijskih sredstava dostaviti izvještaj o utrošku istih.

(4) Za ovu namjenu planirana su financijska sredstva u iznosu od 30.000,00KM.

Član 22.

(sufinansiranje dijela troškova u postupku legalizaciju postojećih stajskih i drugih pomoćnih objekata)

(1) Pravo na ovaj vid poticaja imaju poljoprivredni proizvođači koji su registrovali poljoprivredni obrt i podnijeli zahtjev za legalizaciju ili izgradnju stajskih i drugih pomoćnih objekata na porodičnom poljoprivrednom gazdinstvu.

(2) Maksimalan iznos sredstava koji podnosilac zahtjeva može dobiti po ovom osnovu je 4.000,00 KM zavisno od veličine objekta i vlastitih ulaganja uz priloženu dokumentaciju:

a) pravosnažna urbanistička saglasnost ,

b) uvjerenje da je podnešen zahtjev za izdavanje građevinske dozvole,

c) dokaz o vlastitim ulaganjima (računi o kupljenom građevinskom materijalu ili ovjerena izjava o vlastitim ulaganjima)

(3) Korisnik ovih sredstava u obavezi je da u roku od 60 dana od dana prenosa financijskih sredstava dostaviti izvještaj o utrošku istih.

(4) Za ovu namjenu sredstva su obezbijedena iz stavke „ ostale vrste novčanih poticaja“

IV VISINA I RASPODJELA SREDSTAVA

Član 23.

(raspodjela sredstava)

Sredstva planirana u Budžetu Grada Bihaća u iznosu od 400.000,00KM raspodijelit će se u skladu sa Odlukom na slijedeće oblasti :

R/br.	Vrsta poticaja	Planirana sredstva/ KM
1.	ANIMALNA PROIZVODNJA	
a)	Sufinansiranje vještačkog osjemenjavanja goveda (prvi put) sa 20 KM/grlu	15.000,00
b)	Nabavka hrane za pčele i druge opreme za pčelarstvo	7.000,00
2.	BILJNA PROIZVODNJA	
a)	Sufinansiranje nabavke repromaterijala za proljetnu sjetvu (mineralno đubrivo NPK i sjeme kukuruza)	35.000,00
b)	Sufinansiranje nabavke repromaterijala za jesenju sjetvu (mineralno đubrivo NPK i sjeme pšenice , raži i ječma)	10.000,00
c)	Sufinansiranje proizvodnje krastavca kornišona sa 0,10KM/kg	10.000,00
d)	Poticaji poljoprivrednim proizvođačima koji se bave proizvodnjom kupusa i bijelog luka u iznosu od 300 KM/ha za kupus i 600 KM/ ha za bijeli luk	15.000,00
3.	POTICAJI ZA PROIZVODNJU POVRĆA U ZAŠTIĆENOM PROSTORU	
a)	Poticaji poljoprivrednim proizvođačima koji se bave proizvodnjom povrća u zaštićenom prostoru najmanje površine 100m2 a iznos podrške je 1KM/m2	40.000,00
4.	POTICAJI ZA VOĆARSTVO	

a)	Sufinansiranje kupovine sadnica jagodičastog voća sa 25% od cijene sadnog materijala	15.000,00
5.	POTICAJI ZA PROIZVODNJU GLJIVA	
a)	Poticaji za kupovinu komposta u iznosu od 25KM/toni	5.000,00
6.	OSTALE VRSTE NOVČANIH POTICAJA	248.000,00KM
7.	UKUPNO (1+2+3+4+5+6)	400.000,00 KM

Član 24.

(prestrukturiranje sredstava)

Ukoliko se ukaže potreba , Gradonačelnik će svojim Zaključkom , izvršiti prestrukturiranje sredstava sa pozicija definisanih članom 23. ove Odluke a u okviru odobrenih sredstava na poziciji TG za privredu i turizam- ekonomski kod 614300.

V POSTUPAK ZA OSTVARIVANJE NOVČANIH POTICAJA

Član 25.

(postupak za ostvarivanje poticaja)

(1) Postupak ostvarivanja prava definisanih ovom Odlukom provodi se na osnovu Javnog poziva koji raspisuje Gradonačelnik.

(2) Javni poziv sadrži opće kriterije i posebne uslove za ostvarivanje poticaja iz člana 4. Ove Odluke.

(3) Prijave na Javni poziv podnose se u roku od 30 (trideset) dana od dana objavljivanja Javnog poziva.

(4) Zahtjev za ostvarivanje prava na novčanu podršku u poljoprivredi sa propisanom dokumentacijom podnosi nosilac porodičnog poljoprivrednog gazdinstva.

(5) Izuzetno, zahtjevi za finansiranje projekata u poljoprivredi iz člana 18.ove Odluke podnose se na propisanom obrascu nadležnoj službi tokom cijele tekuće godine.

VI NADZOR NAD PROVOĐENJEM ODLUKE

Član 26.

(nadzor)

(1) Nadzor nad provođenjem Odluke u fazi proizvodnje na terenu potencijalnih korisnika kao i obradu dokumentacije vezano za proizvodnju vrši Služba za opću upravu, privredne i društvene djelatnosti .

(2) Kontrolu utroška sredstava namjenjenih za sufinansiranje projekata iz oblasti poljoprivrede (član 18) obavlja Komisija koju imenuje Gradonačelnik.

Član 27.

(izvještavanje i provođenje odluke)

(1) Za realizaciju ove Odluke zadužuje se Služba za opću upravu,privredne i društvene djelatnosti i Služba za finansije Grada Bihaća.

(2) O utrošenim sredstvima Služba za opću upravu,privredne i društvene djelatnosti dostavlja tromjesečni izvještaj Gradonačelniku.

(3) Gradonačelnik dostavlja godišnji izvještaj o utrošku sredstava namjenjenih za razvoj poljoprivrede na području grada Bihaća ,Gradskom vijeću.

(4) Izvještaj će se objaviti u“ Službenom glasniku Grada Bihaća“ i na web stranici Grada Bihaća.

VII ZAVRŠNE ODREDBE

Član 28.

(stupanje na snagu)

Ova Odluka stupa na snagu osmog dana od dana objavljivanja u „Službenom Glasniku Grada Bihaća“ a objaviće se na web stranici Grada Bihaća ,u sedmičnom listu Unsko sanske novine „Krajina“ i na oglasnoj tabli Grada Bihaća.

Gradsko vijeće

Broj: GV – 14 – 2854/16

Bihać, 28.04.2016.godine

Predsjedavajući Gradskog vijeća

Roman dr. Jurić